

Guangjshih Minzcuz Bau

ganhhau: CN45-0036 B.2019 Nd.11 Ng.13 liggaeuq geijhah nienz ndwencib cibcaet

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3399 期

Gveigangj Si Cinzdangz Gih Banh Bi 2019 Hagseng Dangciengz Raiz Faenzcieng Sawcuengh Doxdax

Vih fungfouq gij ndwenngoenz ndawhag aen hagdangz Cuengh Gun song sawvah, cauh'ok gij heiqfaenh ndei song sawvah gyauyuz, hawj hagseng aen hagdangz Cuengh Gun song sawvah gaenx hag yungh Sawcuengh Vahcuengh, caenh'itbough daezsang gij caetliengh sonhag Cuengh Gun song sawvah gyauyuz, ndwen 11 ngoenz 6, Gveigangj Si Cinzdangz Gih bi 2019 hagseng dangciengz raiz faenzcieng Sawcuengh doxdax youq Mungzgungh Cin Minzcuz Cunghyoz banh. Baez doxdax neix dwg Cinzdangz Gih Gyauyuzgiz cawjbanh, Mungzgungh Cin Cungsim Siujyoz, Mungzgungh Cin Minzcuz Codaengj Cunghyoz ciepbanh,

doxdax faen A cuj(sam, seiq nienzgaep) caeuq B cuj(haj, roek nienzgaep) guh. 64 boux hagseng 7 aen hagdangz Cuengh Gun song sawvah camgya baez doxdax neix.

Mwh doxdax, gyoengq hagseng bouboux cingsaenz gvaekgvaek, nyinh-caen yawj daez, riengjret raiz gij cingz caensaed bonjfaenh. Baez doxdax neix okyienh haujlai boux ak raiz faenzcieng. Gyoengqde raiz Sawcuengh ndei yawj dangqmaz, faenzcieng neiyungz caen, raiz ndaej ciengzaeq, raiz ndaej miz cingz miz ei.

Haujlai faenzcieng gig miz daegsaek, gyoengq hagseng yungh lwgda bonjfaenh yawjraen gij gyaunde

ndwenngoenz, yungh Sawcuengh raiz ok gij ngeixnaemj bonjfaenh, gangjok gij danqhaenh caeuq maqmuengh doi ndwenngoenz, ndaw faenzcieng daejyienh le gij yinxdaeuz vahgangj minzcuz bonjfaenh. Ginggvaq bingzvej nyinhcaen, goengbingz, goengcingq bingzbueng faenzcieng, bingz ok le it, ngeih, sam daengjciengj.

Cinzdangz Gih Gyauyuzgiz yaek daj A、B cuj gak senjbaij 3 boux hagseng daibyaugj Gveigangj Si camgya gaiq daihngaih daengx gih siujhagseng dangciengz raiz faenzcieng Sawcuengh doxdax Swcigih Gyauyuzdingh banh haenx.

(Cinz Souhwngz)

SIUSIK DINJ

● Ndwen 11 ngoenz 7, Dendungh Yen Yihih Cin lienzhab Yen Yinzsegiz youq Banhlungz Cunh banh son dajndaem youzcas. Bouxvunz gisuz dangciengz son dinfwngz guenjieix dajndaem youzcas, son bouxhag ciuq gij saedsaeh dajndaem youzcas senj dieg caeuq cingj dieg, senj cawx dinfax ndei, raed nga coih nga daengj, hawj bouxhag hag rox dinfwngz dajndaem youzcas.

(Nungz Giswnh)

● Mboengqneix, Dendunz Yen Bazgvei Yauzcuz Yangh Cejdaz Cunh lai fuengmienh comz ngaenzcienz, doenggvaq vunzmbanj hozcozse doengjit cawx bwnhfukhab daengj doxgaiq, fat hawj vunz lai daengx cunh mbouj sou cien, bangrengz vunzmbanj laisou vut gungz. Hozdung ngoenzhaenx gungh fat bwnh 416 daeh ca mbouj geijlai dij 4 fanh maenz, leih daengz vunz lai 208 ranz 1300 lai vunz.

(Yangz Cinhungz)

● Geij bi neix daeuj, Denhngoz Yen laeb aen moegbiu hawj vunzgunnaz gyalai souhaeuj, mboujduenh gyagiengz hwnjguh nungzyez giekdaj sezsih, haenqrengz guh ndei hwnjguh dieggoek haeuxgwn, gaenxmaenx doeksaed gak hangh cwngcwz leih daengz vunzgunnaz. Bineix doxdaeuj, aen yienh neix gaenxmaenx doigvangq cehfaen ndei caeuq gauhyauz gungganq, niemh namh dwk bwnh daengj dinfwngz moq, gungh dajndaem haeuxnaz ndei 2.31 fanh moux.

(Banh Suhungz)

● Ginhsiu Yauzcuz Swciyen haiguh “mbouj lumz goeknduj, geiqmaenh sawjmingh” cawjdaez gyauyuz doxdaeuj, daengx yienh gak gaep dangcujciz doenggvaq saekhoengz sonhag, dangjgo bouj hag, veihsin gunghcunghau doisoengq hag daengj fuengsik netsaed haiguh cawjdaez gyauyuz, caenh'itbough daezsang ngeixnaemj roxyiuj, giengzvaq lij lun vujcangh.

(Cinz Haijyen)

Yungzanh: Dajndaem Vagut Henjgim Bangrengz Vut Gungz Laisou



Mboengqneix, Yungzanh Yen Swdingj Cin cien moux vagut henjgim daengz mboengq hai va, dangdieg Bouxcuengh, Yauzcuz daengj vunz lai minzcuz vunznoix ndang daenj buhvaq minzcuz angqhoh vagut henjgim baenz sou. Ciuq gyoepsuenq, aen yienh neix dajndaem vagut henjgim 1000 lai moux, binaengz gujsuenq moix moux roengz goek 500 maenz baedauq, ciuq moix moux sou ndaej 1000 goenggaen sueng, moix moux gai ndaej 5000 maenz, cawz goek ndaej 4500 maenz baedauq. Ndaw doz dwg ndwen 11 ngoenz 7, vunzmbanj youq aen dieggoek dajndaem vagut henjgim Swdingj Cin Cincaij Cunh sou vagut henjgim.

(Danz Gaijhingh/谭凯兴)

Swhyenz: Vwnzva Lijyouz Doxyungz Dajcauh Aen Mbanjyauz Gyaunde

“Nanz lai mbouj ma Nanzmuzvanh, gwnz roen an hwnj hulanzgan, laj deih caep bu roenrinbanj, byaij roen hwnjdaej sim vandiemz.” Ndwen 10 ngoenz 30, aen mbanj gaeuq conzdungj guekgya gaep, dieg geiqniemh hungzginh cangzcwngh Swhyenz Yen Hozgouj Yauzcuz Yangh Cunghbingz Cunh Mbanjbingzsuij diuz roenrinbanj cien daeuj sing fwen goksa, vunzmbanj Lauxveiz ok rog guhhong lai bi haenx baez dauq daengz mbanjranz, yawjraen gij yiengh mbanjranz “gingjsaek gyaunde, vunz ndaw mbanj caeuq bouxhek lumj ranz vunz ndeu nei”, gag gikdoengh ciengq fwen hwnjdaej.

Neix dwg gij ndei yawj Swhyenz Yen cauhlaeb aen yienh lijyouz Guengjsae miz daegsaek, haenqrengz

doicaenh vwnzva lijyouz banggunz bangrengz vut gungz gunggeng. Mbanjbingzsuij yungh gocazgeq naj ranz laeng ranz caeuq gij vwnzva miz Banzyauz daegsaek naekna, ndaej daengz cwngfuj sonyinx, doenggvaq banh ciet mbaet caz doicaenh “caz canjnieb + vwnzva + lijyouz” doxyungz hwnghat, seizneix gaeng baenz dieg guhyienh lijyouz lajmbanj Yauzcuz daegsaek vwnzva Swhyenz Yen. Seizneix, aen mbanj neix 17 ranz ranzungzhoj 66 vunz, gaeng vut gungz 13 ranz 51 vunz, bineix cengaeu cienzmienh vut gungz duet mauh.

Geij bi neix daeuj, aen yienh neix gaemdawz hwnghat seizgei, cingjhab angqhoh minzcuz yangh laebbaenz, angqhoh aen yienh laebbaenz, hwnjguh hawsingz lajmbanj yienghmoq, cinjceng banggunz daengj lai fuengmienh sw-

hyenz, ciuq dieg bae guh, doicaenh hwnjguh “lajmbanj saenqhwngh • Mbanjyauz gyaunde”, youq aen haw guh dajcang, cang daeng, ndaem nywj ndaem va daengj, youq aen mbanj miz daegsaek guh “daenj buh daenj mauh”, hwnjguh camh youqndwi vwnzva. Ciuq gyoepsuenq, daj bi 2014 doxdaeuj, Hozgouj Yauzcuz Yangh gungh cingjhab bued roengz ngaenzcienz 2 ik lai maenz, saedhengz hwnjguh roenloh lajmbanj, gaij yiengh, hwnjguh giuzbumz, hwnjguh vwnzva gvangjcanz, aen guenj geiqniemh hungzginh cangzcwngh gvaq Mbanjyauz, swnjcienz hwnghat Fwenyauz swcigih feihvuzciz vwnzva yizcanj, hwnjguh vwnzva caeuq lijyouz lajmbanj hanghmoeg gungh 100 lai aen.

(Suh Siujginz Yangz Vuj)